



Saunia e Peresitene Thomas S. Monson

Ia Mafaufau i le Ala o Ou Vae

A tatou tepataulai atu ia Iesu o lo tatou Faataitaiga ma a tatou mulimuli i Ona tulagaao, e mafai ona tatou toe foi atu ma le saogalemu i lo tatou Tama Faalelagi.

Ou uso e ma tuafafine pele, ua faamaualaloina lava a'u a o ou tu atu ai i o outou luma i lenei taeao. Ou te talosagaina lo outou faatuatua ma tatalo mo au a o ou faasoa atu ia te outou la'u savali

Sa tatou amatalia uma se malaga matagofie ma le taua ina ua tatou tuua le lalolagi o agaga ma ulufale mai i lenei laasaga luitauina ua ta'ua o le olaga faaletino. O faamoemoega autu o lo tatou ola ai i luga o le fogaeleele o le mauaina lea o se tino o aano ma ivi, ia oo i se aafiaga lea e na o le valavala lava ma o tatou matua faalelagi e mafai ai, ma iloa ai pe tatou te tausia ia polo-aiga. I le tusi a Aperamo, mataupu e 3 tatou te faitau ai: "Ma o le a tatou tofotofoina ai i latou, e vaai pe latou te faia mea uma o soo se mea e poloaiina ai i latou e le Alii lo latou Atua."¹

Ina ua tatou o mai i le lalolagi, sa tatou aumaia faatasi ma i tatou lena meaalofo maoae mai le Atua—o lo tatou faitalia. Ua anoanoai auala ua faamanuiaina ai i tatou e filifili mo i tatou lava. O i ua tatou aoao ai mai manaoga faigata o aafiaga faaletagata lava ia. Tatou te iloatino le va o le lelei ma le leaga. Tatou te iloa le eseese

o le oona ma le suamalie. Ua tatou iloa o faaiuga e iloa ai le taunuuga.

Ou te mautinoa lava sa tatou tuua lo tatou Tama ma se manaoga faaga-eetiaina ia toefoi atu ia te Ia, ina ia mafai ai ona tatou maua le faaeaga na Ia fuafuaina mo i tatou ma lea tatou te matua mananao ai lava. E ui ua tuua i tatou ia saili ma mulimuli i lena ala lea o le a toe taitai atu ai i tatou i lo tatou Tama i le Lagi, ae Na te lei auina maia i tatou iinei e aunoa ma se taitaiga ma se taiala. Ae, ua Ia tuuina mai ia i tatou ni meafaigaluega tatou te manaomiaina, ae o le a Ia fesoasoani mai ia i tatou pe a tatou saili atu i Lana fesoasoaniga ma taumafai e fai mea uma i lo tatou malosi e tumau ai e oo i le iuga ma maua ai le ola e faavavau.

Ina ia fesoasoani e taiala i tatou, ua ia i tatou afioga a le Atua ma Lona Alo o loo maua i totonu o a tatou tusitusiga paia. Ua tatou maua fautuaga ma aoaoga a perofeta a le Atua. O le mea sili ona taua, ua sauniaina mo i tatou se faataitaiga atoatoa e mulimuli i ai—o le faataitaiga a lo tatou Alii ma le Faaola, o Iesu Keriso—ma ua faatonuina i tatou ia mulimuli i lena faataitaiga. Na fetalai le Faaola lava Ia:

"Sau, mulimuli mai ia te au."² "O galuega na outou vaai na ou faia o mea ia tou te faia foi."³ Sa Ia faia le fesili, "O a ituaiga o tagata e tatau ona outou i ai?" Ona Ia tali lea, "E moni ou te fai atu ia te outou, e pei lava o au nei."⁴ "Sa Ia fai le ala ma taitai mai."⁵

A tatou tepataulai atu ia Iesu o lo tatou Faataitaiga ma a tatou mulimuli i Ona tulagaao, e mafai ona tatou toe foi atu ma le saogalemu i lo tatou Tama Faalelagi e mau faatasi ma Ia e faavavau. Sa saunoa le perofeta o Nifae, "Vagana ai ua tumau le tagata sei oo i le iuga, i le mulimuli lea i le faataitaiga a le Alo o le Atua soifua, e le mafai ona faaolaina o ia."⁶

O se tasi tamaitai, o taimi uma na te faamatalaina ai ni aafiaga na ia oo i ai i ana asiasiga i le Nuu Paia, e alaga ai lava, "Sa ou savali i le mea na savali ai Iesu!"

Sa oo o ia i le nuu sa soifua ma aoao atu ai Iesu. Masalo sa ia tu i luga o se papa sa tu muamua ai o Ia pe matamata atu foi i se atumauga na silasila i ai Iesu. O ia lava aafiaga, sa faaga-eetiaina ai o ia; ae o le savali patino i le mea sa savali ai Iesu e itiiti sona taua i lo le savali e pei ona Ia savali. O le faataitaiga o Ana amioga ma mulimuli i Ana faataitaiga e matuai taua lava nai lo le taumafai e toe sue-sue toega o alasavali na Ia savalia i le olaga faaletino.

Ina ua tuu atu e Iesu i se alii mauoa patino le valaaulia, "Sau mulimuli mai ia te au,"⁷ Sa lei faamoemoe moni o Ia ia taumulimuli atu le alii mauoa ia te Ia i luga o mauga ma lalo o vanu o le atunuu.

E le manaomia ona tatou savavali i matafaga o Kalilaia po o atumauga o Iutaia e savali ai i mea na savali ai Iesu. E mafai e i tatou uma ona savavali i le ala na Ia savali ai pe a tatou manatua pea Ana fetalai, pe a faatumulia e Lona Agaga o tatou loto,

ma Ana aooga e taialaina ai o tatou olaga, ma pe a tatou filifili e mulimuli ia te Ia a o tatou faimalaga i le olaga faaletino. E faamalamalamaina e Ana faataitaiga le ala. Sa Ia fetalai, “O au nei le ala, ma le upu moni, ma le ola.”⁸

A o tatou susesueina le ala na savali ai Iesu, o le a tatou iloa ai sa oo foi o Ia i le anoanoai o luitau lava e tasi ia o loo tatou feagai ai i tatou lava i le olaga.

Mo se faataitaiga, sa savalia e Iesu le ala o le le fiafia. E ui sa oo o Ia i le tele o le le fiafia, ae o se tasi o mea sa sili ona faamomoiloto lea sa faaalua i Lana auega i Ierusalem a o faamaeaina Lana galuega i nofoaga faitele. Sa teenaina e le fanauga a Isaraelu le saogalemu o le apaau o le puipuiga lea sa Ia ofoina atu ia i latou. A o Ia silasila atu i le aai lea o le a le pine ae tuulafoaiina i le faafanoga, sa lofituina o Ia i lagona ootia o le faavauvau tele. I le tiga tele sa Ia alaga ai, “Ierusalem e, Ierusalem e, o le fasioti perofeta, ma fetogi i maa ē na auuina atu ia te oe; ua tele lava o’u manao e faapotopoto i lau fanau, e pei o le moa ona ofaofatai i lana toloai i lalo i ona apaau, a e le mafafai outou!”⁹

Sa savalia e Iesu le ala o faaososoga. O Lusifelo, lena leaga e toatasi, na faapotopotoina lona malosililisi, o ana pepelo faatauanau, ma faaosososo o Ia o lē na anapogi mo le 40 aso ma le 40 po. Sa lei gauai atu i ai Iesu, ae, sa Ia teenaina faaososoga taitasi. O Lana fetalai faatofā: “Alu ese ia oe Satani.”¹⁰

Sa savalia e Iesu le ala o le tiga. Mafaufau i Ketesemane, le nofoaga sa “puapuaga [ai] o ia . . . [ma] lona afu foi ua pei o ‘alu’alu toto ua pa’u ifo i le eleele.”¹¹ Ma e leai se tasi e mafai ona faagaloina Ona mafatiaga i luga o le satauro tiga.

O le a savalia e i tatou taitoatasi le ala o le le fiafia, masalo ona o se avanoa ua maumau, o se pule ua



faaoga sese, o ni filifiliga a sē pele, po o se filifiliga e faia e i tatou lava. O le a avea foi le ala o faaososoga ma ala o tagata taitoatasi. Tatou te faitau i le vaega 29 o le Mataupu Faavae ma Feagaiga: “Ma e ao ina faaososoina e le tiapolo le fanauga a tagata, [a leai] e le mafai ona avea i latou ma pule ia te i latou lava.”¹²

E faapena foi ona tatou savavali i le ala o le tiga. I le avea ai ma ni auuina, e le mafai ona tatou faamoemoeina nisi mea e sili atu nai lo mea na oo i le Matai, o le na tuua le olaga nei ina ua mavae le tiga tele ma puapuaga.

Peitai, e ui lava o le a tatou mauaina i luga o lo tatou ala le faanoanoa matuitui, e mafai foi ona tatou mauaina le fiafia tele.

E mafai foi ona tatou savavali faatasi ma Iesu i le ala o le ususitai. O le a le faigofie i taimi uma, ae ia avea ma a tatou anavatau le tofi na tuuina mai e Samuelu: “Faauta, o le faalogo e sili lea i le taulaga, ma le ususitai e sili lea i le ga’o o le mamoe po’a.”¹³ Ia tatou manatua o le taunuuga faaii o le le ususitai o le nofopologa ma le oti, ae o le tau i le ususitai o le saolotoga ma le ola e faavavau.

E pei o Iesu, e mafai ona tatou savavali i le ala o le auuina atu. E pei o se sulu malamalama o le agalelei, o le soifuaga lea o Iesu a o Ia auuina atu i tagata. Sa Ia aumaia le malosilisi i vae o pipili, le pupula i mata o tauaso, le faalogo i taliga o e logonoa.

Sa savalia e Iesu le ala o le tatalo. Sa Ia aoao mai i tatou i le ala e tatalo ai e ala i le tuuina mai ia i tatou o le tatalo matagofie ua tatou iloa o le Tatalo a le Alii. Ma o ai se e galo ia te ia Lana tatalo i Ketesemane: “Aua le faia lo’u loto, a o lou finagalo.”¹⁴

O isi faatonuga ua tuuina mai ia i tatou e le Faaoala ua tatou taulimaina, o loo maua i tusitusiga paia. I Lana lauga i luga o le Mauga, ua Ia tau mai ai ia i tatou ia alofa mutimutivale, ia lotomaulalalo, ia amiotonu, ia loto mama, ia avea ma ē faatupuina le filemu. Ua Ia faatonuina i tatou ia tutu atu ma le toto mo o tatou talitonuga, e tusa lava pe tauemuina ma sauaina i tatou. Ua Ia faatonuina i tatou ia faasusulu atu lo tatou malamalama ina ia mafai ona vaaia e isi ma mananao ai e vivii atu i lo tatou Tama i le Lagi. Ua Ia aoaoina i tatou ia amio mama i o tatou mafaufauga ma a tatou amioga. Ua Ia tau mai ia i tatou e sili atu lava le taua o le faaputuina o oa i le lagi i lo oa i le lalolagi.¹⁵

O Ana faataoto o loo aoao mai i le mana ma le pule. I le tala i le Samaria agalelei, ua Ia aoao ai i tatou ia alolofa atu ma auuina atu i o tatou tuaoi.¹⁶ I Lana faataoto i taleni, ua Ia aoao mai ai i tatou ia faaleleia i tatou lava ma ia tauivi mo le atoatoa.¹⁷ I le faataoto o le mamoe na se, ua Ia faatonuina ai i tatou ia o atu e laveai mai i latou o ē ua tuua le ala ma ua leiloa lo latou ala.¹⁸



A o tatou taumafai e tuu Keriso i le totonugalemu o o tatou olaga e ala i le aoaoina o Ana afioga, e ala i le mulimuli i Ana aoaoga, ma e ala i le savavali i Ona ala, ua Ia folafola mai e faasoa mai ia i tatou le ola e faavavau lea na Ia maliu ai ia maua. E leai se isi taunuuga e maualuga atu i lo lenei, ia tatau ona tatou filifili e talia Lana aoaiga ma avea ma Ona soo ma faia Lana galuega i o tatou olaga atoa. E leai se isi lava mea, leai se isi lava filifiliga tatou te faia, e mafai ai ona avea i tatou ma tagata e sili atu i lo le tagata e mafai ona Ia faia e avea ai i tatou.

A o ou mafaufau ia i latou o ē o loo taumafai moni lava e mulimuli i le faataitaiga a le Faaola ma ē o loo savavali i Lona ala, e vave lava ona ou mafaufau ia Gustav ma Margarete

Wacker—o nisi e toalua o tagata sili ona faapei o Keriso ua ou iloaia. O i laua o ni tagatanuu o Siamani sa malaga atu i Kanata i sasae, ma sa ou feiloai i ai a o ou auauna atu o se peresitene o se misiona iina. Sa faigaluega Uso Wacker o se tagata oti ulu. E ui sa tapulaa a la tupe maua, ae sa la faasoa atu pea a laua mea uma e maua. Sa lei faamanuina i laua i se fanau, ae sa laua faafaileleina uma ē na ulu atu i lo la fale. O alii ma tamaitai aoaoina ma sili ona atamamai sa saili atu i nei auauna a le Atua faatau-vaa e le'i aotauina ma faitaulia lo latou lava manuia pe afai sa mafai ona latou faaaluina se itula e faatasi ai ma i laua.

O o la foliga vaaia masani o aso uma, sa tau panupanu le nanu ma sa fai si faigata ona malamalama i ai, ma

sa faatauavaa lava si o la fale. Sa lei o la umiaina se taavale po o se televise, pe na faia soo se mea lea e masani ona gauai atu i ai le lalolagi. Ae sa asa atu pea e ē faatuatua se ala i lo la fale ina ia mafai ona latou tofo i le agaga sa i ai iina. O lo la fale o se lagi i le lalolagi, ma o le agaga na la faasusulu atu o se filemu a'ia'i ma le agalelei.

E mafai foi ona tatou mauaina lena agaga ma e mafai ona faasoa atu i le lalolagi a o tatou savavali i le ala o loo tatou Faaola ma mulimuli i Lana faataitaiga atoatoa.

Tatou te faitau i le Faataoto i le apoapoaiga, “Ia mafaufau i le ala o ou vae.”¹⁹ A tatou faia, o le a tatou maua le faatuatua, e oo lava i le manao, e savavali i le ala lea na savalia e Iesu. O le a leai so tatou masalosalo o loo tatou i ai i luga o le ala lea e finagalo loo tatou Tama ia tatou mulimuli i ai. O le faataitaiga a le Faaola ua tatou maua ai se mamanu mo mea uma tatou te faia, ma o Ana afioga ua maua ai se taiala lemafaatoilaloia. O Lana ala o le a taitai atu ai i tatou ma le saogalemu i le aiga. Ia avea lenei mea ma o tatou faamanuiga, ou te tatalo ai, i le suafa o Iesu Keriso, le ou te alofa i ai, le ou te auauna i ai, ma le ou te molimau atu ai, amene. ■

FAAMATALAGA

1. Aperaamo 3:25.
2. Luka 18:22.
3. 3 Nifae 27:21.
4. 3 Nifae 27:27.
5. Eliza R. Snow, “Ma’eu le Poto ma le Alofa,” *Viiga*, nu. 109.
6. 2 Nifae 31:16.
7. Luka 18:22.
8. Ioane 14:6.
9. Luka 13:34.
10. Mataio 4:10.
11. Luka 22:44.
12. Mataupu Faavae ma Feagaiga 29:39.
13. 1 Samuēlu 15:22.
14. Luka 22:42.
15. Tagai Mataio 5; 6.
16. Tagai Luka 10:30–37.
17. Tagai Mataio 25:14–30.
18. Tagai Luka 15:4–7.
19. Faataoto 4:26.